

सम्पादक

धर्मचक्रवर्ती महामहोपाध्याय कविकुलरत्न वाचस्पति श्रीचित्रकूट तुलसीपीठाधीश्वर जगद्गुरु रामानन्दाचार्य  
स्वामी रामभद्राचार्यजी महाराज

जीवनपर्यन्त कुलाधिपति जगद्गुरु रामभद्राचार्य विकलांग विश्वविद्यालय, चित्रकूट

## श्रीहनुमते नमः श्री हनुमान चालीसा

दोहा

श्रीगुरु चरन सरोज रज निज मन मुकुर सुधारि।  
बरनऊँ रघुबर बिमल जस जो दायक फल चारि॥  
बुद्धि हीन तनु जानिकै सुमिरौँ पवन कुमार।  
बल बुधि बिद्या देहु मोहि हरहु कलेश विकार॥

चौपाई

जय हनुमान ज्ञान गुण सागर। जय कपीश तिहुँ लोक उजागर॥  
राम दूत अतुलित बल धामा। अंजनिपुत्र पवनसुत नामा॥  
महाबीर बिक्रम बजरंगी। कुमति निवार सुमति के संगी॥  
कंचन बरन बिराज सुबेषा। कानन कुंडल कुंचित केशा॥  
हाथ बज्र और ध्वजा बिराजै। काँधे मूँज जनेऊ साजै॥  
शङ्कर स्वयं केशरीनंदन। तेज प्रताप महा जग बंदन॥  
विद्यावान गुणी अति चातुर। राम काज करिबे को आतुर॥  
प्रभु चरित्र सुनिबे को रसिया। राम लखन-सीता मन बसिया॥  
सूक्ष्म रूप धरि सियहिं दिखावा। बिकट रूप धरि लंक जरावा॥  
भीम रूप धरि असुर सँहारे। रामचन्द्र के काज सँवारे॥  
लाय संजीवनि लखन जियाये। श्री रघुबीर हरषि उर लाये॥  
रघुपति कीन्ही बहुत बड़ाई। तुम मम प्रिय भरतहिं सम भाई॥  
सहस बदन तुम्हरो जस गावैँ। अस कहि श्रीपति कंठ लगावैँ॥  
सनकादिक ब्रह्मादि मुनीशा। नारद शारद सहित अहीशा॥  
जम कुबेर दिगपाल जहाँ ते। कबि कोबिद कहि सकै कहाँ ते॥  
तुम उपकार सुग्रीवहिं कीन्हा। राम मिलाय राज पद दीन्हा॥  
तुम्हरो मंत्र बिभीषन माना। लंकेश्वर भए सब जग जाना॥  
जुग सहस्र जोजन पर भानू। लील्यो ताहि मधुर फल जानू॥  
प्रभु मुद्रिका मेलि मुख माहीं। जलधि लाँघि गये अचरज नाहीं॥  
दुर्गम काज जगत के जेते। सुगम अनुग्रह तुम्हरे तेते॥

राम दुआरे तुम रखवारे। होत न आज्ञा बिनु पैसारे।।  
सब सुख लहैं तुम्हारी शरना। तुम रक्षक काहू को डर ना।।  
आपन तेज सम्हारो आपै। तीनों लोक हाँक ते काँपै।।  
भूत पिशाच निकट नहिं आवै। महाबीर जब नाम सुनावै।।  
नासै रोग हरै सब पीरा। जपत निरंतर हनुमत बीरा।।  
संकट ते हनुमान छुड़ावै। मन क्रम बचन ध्यान जो लावै।।  
सब पर राम राय सिरताजा। तिन के काज सकल तुम साजा।।  
और मनोरथ जो कोउ लावै। तासु अमित जीवन फल पावै।।  
चारों जुग परताप तुम्हारा। है परसिद्ध जगत उजियारा।।  
साधु संत के तुम रखवारे। असुर निकंदन राम दुलारे।।  
अष्ट सिद्धि नव निधि के दाता। अस बर दीन्ह जानकी माता।।  
राम रसायन तुम्हरे पासा। सदा रहउ रघुपति के दासा।।  
तुम्हरे भजन राम को पावै। जनम जनम के दुख बिसरावै।।  
अंत काल रघुबर पुर जाई। जहाँ जन्म हरिभक्त कहाई।।  
और देवता चित्त न धरई। हनुमत सेइ सर्व सुख करई।।  
संकट कटै मिटै सब पीरा। जो सुमिरै हनुमत बलबीरा।।  
जय जय जय हनुमान गोसाईं। कृपा करहु गुरु देव की नाई।।  
यह शत बार पाठ कर जोई। छूटै बंदि महा सुख सोई।।  
जो यह पढ़ै हनुमान चालीसा। होय सिद्धि साखी गौरीसा।।  
तुलसीदास सदा हरि चेरा। कीजै नाथ हृदय महँ डेरा।।

### दोहा

पवन तनय संकट हरन मंगल मूरति रूप।  
राम लखन सीता सहित हृदय बसहु सुर भूप।।

सियाबर रामचन्द्र की जय,  
पवनसुत हनुमानजी की जय,  
गोस्वामी तुलसीदास की जय

\* \* \* \* \*